



www.allschwiler-fasnacht.ch

Prolog Blaggedde 2024

Motto: «S fäggt allewyl no»

Am Fasnachts-Sunntig dien mir jubiliere
Und zum 75. Mool durch s Dorf flaniere
Vor dreiviertel Joorhundert, es isch e soo
Het d Dorffasnacht e neue Aalauff gnoo
Nach de Chriegsjoor, mit all iirem Schregge
Probiert me dä Volggsbruuch neu z erwegge
Doch dä Versuech goot in d Hoose
D Fasnacht 1949 hets verboose
Vom alte Schwellemer Fasnachts-Comité
Hesch wyt und breit au nüt me gsee
Dr Fasnachtsgeischt, mir sages unumwunde
Isch z Allschwil spuurloos verschwunde

Do heisst im Wilde Viertel hinde:
«Dä alti Bruuch dörf nit verschwinde.»
Im alte Schlüssel an der Stammtisch-Runde
Wird d Schwellemer Fasnacht neu erfunde
E baar Buure stelle Rösser und Wäage
Dr Schlüsselwirt git dr geischtig Sääge
Drey Wuche het me numme Zyt
Mit 17 Nummere isch me denn sowyt,
dass me am 18. Hoornig, nach grosser Mee,
bi Sunneschyn durchs Dorf cha ziee.
Nach dr Fasnacht duet me unter Fründe,
e Clique im Wilde Viertel gründe.
Vo jetz aa wird d WVC s Heft übernää,
e Fasnachtsflobb sölls nie mee gää.

So zien mir Joor für Joor mit Sujetwäage,
mit Schyssdräggzüügli – hoffentlich nit bi Rääge,
mit Dambuure- und mit Pfiffergruppe,
im Dorf gseesch Faane und Fasnachtsbuppe
und d Gugge bloose schräägi Döön,
jä Schränze isch doch schuurig schön.
Dr Spreuer fliegt ab de Waggiswäage,
Räppliwoolge, e waare Sääge
und vom Morgestreich, speziell aber nit grooss,
ziet me d Ladäärne jetz dur d Baslerstrooss.
All die Motiv, was wit no mee,
chasch uf dr diisjäärige Blaggedde gsee.
Dangg an Werni Löffel in de höchste Döön,
denn si Kunschtwäärgg isch doch wunderschön.
Und s neue «Schwellemerli» zeigt in voller Pracht,
d Jubilääums-Fasnacht isch jetz an dr Macht.

Liebi grossi Fasnachts-Schaar
Für d WVC ischs sunneklaar
Dank eurem Ysatz, das isch famoss
Wär unseri Dorffasnacht nit so gross
Uf euch sin mir mächtig Stolz
Dir sind us guetem Fasnachtsholz
Mir bruuche euch, nach wie voor
Für jedes neue Fasnachtsjoor
Zämme wänn mir uns jetz freue
Uf d Fasnachtsdääg – die neue
Dr Fasnachtsgeischt sell über Allschwil schwääbe
Nur zämme chönne mir das so richtig erlääbe
Drum heisst immer no, mir sin so froo:
«S fäggt z Schwelleme ebbe allewyl noo.»

d Chrutstorze
Wildviertel-Clique Allschwil